

10

Edukasyon sa Pagpapakatao

Ikatlong Markahan - Modyul 1 Katangian na Tao bilang Espiritwal na Nilalang

Ang modyul na ito ay sama-samang binuo at sinuri ng mga edukador sa mga publikong paaralan. Hinihikayat naming ang mga guro at iba pang nasa larangan ng edukasyon na mag-email ng kanilang puna at mungkahi sa Kagawaran ng Edukasyon sa bukidnon@deped.gov.ph

Pinahahalagahan namin ang inyong mga puna at mungkahi.

Paunang Salita

Para sa tagapagdaloy:

Malugod na pagtanggap sa asignaturang Edukasyon sa Pagpapakatao 10 ng Alternative Delivery Mode (ADM) Modyul para sa araling Ang Pagkukusa ng makataong Kilos at Mga Salik na Nakaaapekto sa Pananagutan ng tao sa Kahihinatnan ng Kilos at Pasiya.

Ang modyul na ito ay pinagtulungang dinisenyo, nilinang at sinuri ng mga edukador mula sa pambuliko at pampribadong institusyon upang gabayan ka, ang gurong tagapagdaloy upang matulungang makamit ng mag-aaral ang pamantayang itinakda ng Kurikulum ng K to12 habang kanilang pinanagumpayan ang pansarili, panlipunan at pang-ekonomikong hamon sa pag-aaral.

Ang tulong-aral na ito ay umaasang makauugnay ang mag-aaral sa mapatnubay at malayang pagkatuto na mga gawain ayon sa kanilang kakayahan, bilis at oras. Naglalayon din itong matulungan ang mag-aaral upang makamit ang mga kasanayang pan-21 siglo habang isinasaalang-alang ang kanilang mga pangangailangan at kalagayan.

Bilang karagdagan sa materyal ng pangunahing teksto, makikita ninyo ang kahong ito sa pinakakatawan ng modyul:



Mga Tala para sa Magulang

Mga mahal naming magulang ikinalulugod namin ang iyong katatagang loob at pagsisikap na makakapagpatuloy ng pag-aaral ang iyong anak. Naway lagi kayong maging gabay at inspirasyon sa lahat ng kanilang mga gawain. Sa lahat ng panahon kami ay magsilbing kaagapay ninyo sa pagpapaunlad ng ating mga kabataan. Naway ang modyul na ito ay magiging mahalagang instrumento na matulungan ninyong magabayan din sila.

Bilang tagapagdaloy, inaasahang bibigyan mo ng paunang kaalaman ang mag-aaral kung paano gamitin ang modyul na ito. Kinakailangan ding subaybayan at itala ang pag-unlad nila habang hinahayaan silang pamahalaan ang kanilang sariling pagkatuto. Bukod dito, inaasahan mula sa iyo na higit pang hikayatin at gabayan ang mag-aaral habang isinasagawa ang mga gawaing nakapaloob sa modyul.

Aralin

1

Ang Katangian na Tao bilang Espiritwal na Nilalang



Alamin



Kumusta ka na? Kudos ang galing mo! Medyo malayo layo na rin ang nalakbay mo sa asignaturang ito dahil umabot na tayo sa ikatlong markahan. Eka nga ang pinakahabang paglalakbay ay ang paglalakbay tungo sa ating sarili, kaya tara na! ipagpatuloy ang paglalakbay sa landas patungo sa iyong sarili. Naway magsisilbing gabay ang modyul na ito sa iyong dagdag na pag-unawa sa iyong katangian bilang tao . Ano ba ang inaasahan na magawa mo sa modyul na ito?

Sa modyul na ito, inaasahang maipamamalas mo ang sumusunod na kaalaman, kakayahan at pag-unawa:

1. Natutukoy ang mga katangian ng tao bilang espiritwal na nilalang.
2. Nasusuri ang sariling ugnayan sa Diyos



Mga Tala para sa Magulang

Inaasahan naming bilang mga magulang na patuloy na magabayan ang mag –aaral/ iyong anak sa gitna ng mga hamon sa *new normal approach* ng pag-aaral. Naway bilang mga mag-aaral matulungan sila ng suporta at makahanap ng sandigan sa pagsagawa ng mga gawain sa modyul na ito.



Tuklasin



Handa ka na ba? Tayo Na! Sasamahan kita sa pagtuklas sa iyong katangian at espiritwalidad..

Gawain 1: Basahin ang mga linya mula sa Salmo 19 sa banal na aklat/bibliya. Magsisilbing panalangin ito habang babasahin mo ito ng banayad.

DAKILA ANG DIYOS SA GITNA NG MGA NILIKHA

Ang langit ay naghahayag na ang Diyos ay dakila!
Malinaw na nagsasaad kung ano ang Kanyang gawa!
Bawat araw, bawat gabi, ang ulat ay walang patlang,
Patuloy na nag-uulat sa sunod na gabi't araw,
Walang tinig o salitang ginagamit kung sa bagay
At wala ring naririnig na kahit anong ingay;
Gayon pa man, sa daigdig ay laganap yaong tinig
Ang balita'y umaabot sa duluhan ng daigdig

Itong Diyos ay nagtayo ng tolda sa kalangitan
Mula roon, kung umaga'y lumalabas itong araw
Katulad ng naglalakad na lalaking ikakasal,
Parang isang manlalaro na handing makipaglaban
Sa silangan sumisikat, lumulubog sa kanluran, init nito'y
nadarama ng lahat ng daigdig

Pagkatapos mong mabasa, ipikit ng iyong mga mata ng sandal (mas makakatulong kung ito ay may saliw na banayad o instrumental music).

Tanong:

1. Anu-ano ang mga naisip o nailarawan mo sa iyong pananahimik na nagpapadama ng presensya ng Diyos? Naisip at nailarawan ko ang

2. Anong katangian kaya meron ka bilang tao na wala sa ibang nilalang? Ang mga ktangian ko bilang nilalang ng Diyos na wala sa ibang nilikha ay

3. May kaugnayan ba ito sa iyong mga piniling ilista sa naunang mga Gawain? May nabago ba sa iyong dapat na naisali sa paglista ng mga di nabibili ng pera? Anu-ano ang mga iyon?

Oo merong mga nabago at naidagdag gaya ng



Suriin



Tayo na ating ating lakbayin ang mundo ng pagsusuri!

Sa simula pa man ng kasaysayan, naniniwala na ang tao sa katotohanang may higit na kapangyarihan kaysa sa sinumang tao o nilalang sa sansinukob. Ang katotohanang ito ay tinatawag na Diyos, Panginoon, Allah, Yahweh o Maykapal. Sa naunang linya mula sa banal na aklat ang tao lamang ang may kakayahang makita at makilala ang kadakilaan ng Diyos. Ang isang mag-aaral na kasinggulang mo ay nabiyayaan ng Panginoon ng likas at natatanging talino. Ito ay dapat linangin at gamitin upang lalo mong maunawaan ang iyong pakikipag-ugnayang espiritwal sa Panginoon. Sa mga linya mula sa Salmo ipahayag ni Haring David sa uanahan,

ang tao ay may kakayahang alamin, kilalanin at purihin ang Poong Maylikha. Ang tao lamang ang may espiritwal na katangian na nakakakilala ng kanyang Maylikha.

Pinakamahalaga ang tao sa lahat ng mga nilikha ng Diyos. Ito ay nababatay sa diwang ispiritwal ang kanyang buhay. Ayon kay Leo Buscaglia sa kanyang aklat na *Personhood: Supreme Value Across Cultures*, pinapakita ng mga relihiyon, pilosopiya at pananampalataya na ang pagiging ekumenikal ng paniniwala sa kahulugan ng buhay ng tao. Ang lahat ng mga paniniwala ay nagkakaisa na dimateryal ang dahilan ng pagkalikha ng buhay. Nababatay ang kahulugan ng buhay ng mga taong nilikha ng Diyos sa diwang ispiritwal. Sapagkat ang tao ay natatanging nilalang ng Diyos, siya ay biniyayaan ng likas na kagandahang loob na siyang ugat ng kanyang mga pagpapahalaga. Nasa tao ang lahat ng pagkakataon upang padaluyin niya ang mga pagpapahalagang ito. Ito ay karaniwan ng naisasagawa sa pamamagitan ng kanyang pagtaguyod sa mga gawaing magpapatingkad sa kabutihang loob na mahalagang susi tungo sa kaayusan at magandang samahan sa kapwa.

Hindi sapat na mabuhay lamang ang tao. May mga bagay na dapat niyang gawin habang siya ay nabubuhay. Sa wastong paggamit ng talino at kakayahan, higit na madali ang pag-abot sa mga mithiin na ikalulugod ng Poong Maylikha. Bilang espiritwal na nilalang may kakayahan tayong suriin ang ugnayan natin sa Diyos. Sa pamamagitan ng pagninilay-nilay o malalim at matalinong pag-iisip at mauunawaan natin na ang Diyos ay ating kasama sa mga karanasan natin sa pang-araw-araw na buhay. Kahit na minsan ay nakadarama tayo ng kalungkutaan at kabiguan sa buhay, ang mga ito ay paraan lamang ng Diyos upang tayo ay matuto sa ating buhay.

Tayo ay hinuhubog Niya parang diyamante. Katulad ng isang diyamante, ay inaalalis niya sa pamamagitan ng kabiguan at pagsubok sa buhay ang mga imperpeksyon nito ng sa ganoon ay maging tunay ang kinang ng diyamante. Ang mga karaniwang paraan ng pandama sa presensya ng Panginoon ay magagawa sa pamamagitan ng repleksyon sa mga kagandahan at kahiwagaan ng kalikasan, mabuting kalooban ng kapwa at sa pagninilaynilay sa kabutihan ng Diyos sa oras ng pag-iisa lalo na sa panahon ng suliranin at pagsubok. Lagi nating kausapin ang Panginoon. Kung nais mo ng mapayapang buhay, kinakailangang makipag-ugnayan sa Kanya. Maari mo Siyang kausapin, kahit kailan, kahit saan. Sabihin mo lamang na nais mo Siyang makausap dahil ikaw ay espiritwal na nilalang. Itungo mo ang iyong ulo at damhin na Siya ay nandiyan. Sa panahon ng pandemya tulutan nating kilalanin at damhin ang mga bagay na likas na mahalaga bilang taong may kakayahang kilalanin ang Diyos.

Namnamin natin ang mga biyaya : gaya ng biyaya ng kalikasan, biyaya ng mga mahal sa buhay na nakapalibot sa atin, biyaya ng oras ng pagninilay-nilay, biyaya ng tahimik at simpleng buhay. Ika nga naririnig natin palagi ang mga katagang” what is essential is invisible in the eyes”. Nawa’y magsilbing gabay natin ang paghahanap ng tunay na kaligayan at kapayapaan sa pagpapaunlad ng ating katangian bilang espiritwal na nilalang ng Diyos.